

WYNN, WILLIAM (1709 - 1760), clerigwr, hynafiaethydd, a bardd

Enw: William Wynn
Dyddiad geni: 1709
Dyddiad marw: 1760
Rhiant: Margaret Wynn (née Lloyd)
Rhiant: William Wynn
Rhyw: Gwryw
Galwedigaeth: clerigwr, hynafiaethydd, a bardd
Maes gweithgaredd: Crefydd; Hanes a Diwylliant; Barddoniaeth
Awdur: Robert Gwilym Hughes

ei dad, [William Wynn](#), Maesyneuadd, plwyf Llandecwyn, Meirionnydd ([gweler yr ysgrif ar y teulu](#)), yn uchel-siryf (1714), a'i fam Margaret, merch ac aeres Roger Lloyd o Ragad, yn perthyn i deuluoedd hynafol eraill, megis [Nannau](#), a Helygen yn Nhegeingl. Ymaelododd Wynn yng Ngholeg Iesu, Rhydychen, 14 Mawrth 1727, a graddio'n B.A. 12 Hydref 1730, ac yn M.A. 15 Gorffennaf 1735. Trwyddedwyd ef 22 Medi 1734 yn ddiakon yn Watlington gerllaw Rhydychen, a symudodd i Lanbryn-mair wedi ei benodi'n ficer y plwyf hwnnw 9 Mehefin 1739. Bu ymryson rhyngddo â [Howel Harris](#) yn Lanbryn-mair Tachwedd, 1740. Priododd â Martha Roberts, Rhydonnen, Llandysilio gerllaw Dinbych, 6 Awst 1742. Bu iddynt blant a chyfeirir atynt gan Wynn (Panton MS. 58 (185)) a chan [William Morris](#) (*Morris Letters*, ii, t. 168); ymaelododd ei fab Robert yng Ngholeg Iesu (31 Mawrth 1762) a chladdwyd ei ferch, Margaret, yn Lanbryn-mair (12 Mawrth 1747). Derbyniodd Wynn reithoraeth Manafon 15 Mawrth 1747 gan gartrefu yn Aberriw. Ychwanegwyd bywoliaeth Llangynhafal iddo at Manafon 28 Ebrill 1749, ac yn Llangynhafal y bu farw 18 Ionawr 1760, ac y claddwyd ef 28 Ionawr. Ymddiddorai mewn hynafiaethau a llenyddiaeth Gymraeg, gan ohebu â'i gyfeillion yng nghylch y [Morrisiaid](#) yn bennaf ar y pynciau hyn, yng ngolau MSS. a gasglodd ac y gwnaeth gopïau ohonynt. Canodd ychydig gywyddau, cerddi, carolau ac englynion, ar destunau arferol ei gylch a'i gyfnod. Ac er nad oedd iddo fawredd [Goronwy Owen](#) na [Lewis Morris](#), eto, trwy ei ddysg Gymraeg, a'i waith yn casglu MSS., a thrwy ei lythyrau a'i ganeuon, bu iddo yntau ei ran yng nghylch y [Morrisiaid](#) mewn cloddio at sylfeini'r traddodiad Cymraeg a esgeuluswyd yn y ddwy ganrif flaenorol.

Awdur

Y Parchedig Robert Gwilym Hughes, (1910 - 1997)

Ffynonellau

J. E. Griffith, *Pedigrees of Anglesey and Carnarvonshire Families* (1914), 283, 299

cofrestrau'r plwyfi a enwir uchod

'Institution Books' esgobaethau Rhydychen a Llanelwy

Foster, *Alumni Oxonienses*

Cylchgrawn Cymdeithas Hanes y Methodistiaid Calфинаidd, XXV, ii, 432

The Letters of Lewis, Richard, William, and John Morris, of Anglesey, (Morrisiaid Môn) 1728-1765 (1907–9) (deugain cyfeiriad; gweler y mynegeion)

llythyrau yn *Y Cymmrodor*, XLIX, i (mynegeion)

caneuon yn *Blodeu-Gerdd Cymry* (Mwythig 1759), 1759 a 1779

Dewisol Ganiadau yr oes hon Yn ddwy rhann Y rhann gyntaf. Sydd yn cynwys englynion, cywyddau ac awdlau, o waith yr awduriaid goreu yn yr oes bresennol Yr ail rhann. Carolau plygain a cherddi newyddion, na fuant yn argraphedig erioed o'r blaen. O waith llawer o beirdd Cymru (Amwythig 1779)

Jones (gol.), *Llu o Ganiadau, neu gasgliad o garolau a cherddi dewisedig* (Croesoswallt 1798), 1798

Llawysgrif Mostyn yn Llyfrgell Genedlaethol Cymru, Aberystwyth 165

Dolenni Ychwanegol

Wikidata: [Q8020626](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

